



Somo Kipenzi la Kristo

Yawafaa ninyi mimi niondoke, kwa maana mimi nisipoondoka, huyo Msaidizi hatakuja kwenu; bali mimi nikienda zangu, nitampeleka kwenu. Naye akiisha kuja, huyo atauhakikisha ulimwengu kwa habari ya dhambi, na haki, na hukumu.—Yohana 16:7, 8.

Kristo, Mwalimu Bora kabisa, alikuwa na aina nyingi sana za masomo ambayo angeweza kuchagua kati yao, lakini moja ambalo Yeye alilifundisha zaidi lilikuwa ni utolewaji wa Roho Mtakatifu (Selected Messages 1:156).

Katika kuielezea kazi ya Roho Mtakatifu, Yesu alitaka kuwapa wanafunzi Wake furaha na tumaini lililokuwa moyoni Mwake. Alifurahi kwa sababu ya msaada mkubwa aliutoa kwa ajili ya kanisa Lake. Kipawa cha Roho Mtakatifu kilikuwa cha juu kabisa kuliko zawadi zote ambazo angemwomba Baba Yake kwa ajili ya watu Wake. Roho anayekuja anao uwezo wa kuhuisha upya maana pasipo huo, kafara ya Yesu ingekuwa bure. Uwezo wa uovu ulikuwa ukiongezeka karne hadi karne, na utiifu wa watu kwa vitendo viovu ulikuwa unashangaza. Dhambi ingeweza tu kukabiliwa na kushindwa kwa uwezo wa Nafsi ya tatu ya Uungu ambayo ingekuwa katika uweza tele wa Mungu. Roho huwezesha mambo yaliyokamilishwa na Mwokozi wa ulimwengu. Moyo hutakaswa kwa uweza wa Roho Mtakatifu. Kupitia kwa Roho Mtakatifu waumini huwa washiriki wa asili ya Uungu. Kristo ametoa Roho Wake ili kuleta ushindi dhidi ya dhambi za kurithi na mielekeo ya kutenda uovu na kupiga chapa ya tabia Yake Mwenyewe juu ya kanisa Lake.

Kuhusu Roho Mtakatifu, Yesu alisema “Yeye atanitukuza Mimi” Mwokozi alikuja kumtukuza Baba kwa kuonesha pendo Lake; hivyo Roho Mtakatifu humtukuza Kristo kwa kudhihirisha neema Yake ulimwenguni. Sura hasa ya Mungu sharti irudishwe tena ndani ya wanadamu. Heshima ya Mungu, heshima ya Kristo inahusika katika ukamilishaji wa tabia ya watu Wake.

Wakati “Roho wa kweli atakapokuja, atauhakikisha ulimwengu katika habari ya dhambi na haki na hukumu.” Kuhubiri Neno la Mungu hakutafaa kitu bila uwepo endelevu na msaada wa Roho Mtakatifu. Huyu ni Mwalimu pekee mwenye kuleta matokeo yanayotakiwa ya ukweli wa Mungu. Ni pale tu Roho Mtakatifu anapoandamana na ukweli moyoni ndipo huleta mabadiliko au kuanzisha maisha mapya katika mtu. Mtu anaweza kuwasilisha kwa usahihi maneno ya Mungu, anaweza kuwa na ufahamu wa amri na ahadi Zake; lakini hadi pale Roho Mtakatifu atakapoweka ukweli wazi hakuna roho itakayoanguka katika mwamba na kuvunjwa. Hakuna kiwango chochote cha elimu, wala manufaa hata kama ni makubwa kiasi gani yanayoweza kuwa njia ya nuru pasipo ushirikiano wa Roho wa Mungu.... Ahadi hii ya baraka iliyoahidiwa ikiombwa kwa imani, italetwa baraka zingine katika msafara wake. Hutolewa kwa kadiri ya utajiri wa neema ya Kristo na Yeye yuko tayari kutoa kwa kila nafsi kulingana na uwezo wake wa kuipokea (Tumaini la Vizazi Vyote, sehemu ya 2, uk. 284–285).